



**Kalaallit Nunaanni Piartortut najugaqarfissaannik Naalakkersuisut pilersitsinissaq anguniarlugu suliaqarnissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Napātôk', Partii Naleraq)

(Siullermeerneqarnera)

Demokraatit peqqissaasutullu inuiaqatigiit napparsimarulullutik paarineqarnissamik aammalu inuunermik nalittorsaanissamut periarfissai pillugit eqqartueqataasinnaagama nuannaarutigaa. Sammisamut matumunnga periarfissat annikimmata tikkuussisariaqarpugut.

Peqqinnissaqarfik piartortunut atugassaannik periarfissanillu pitsaasunik pilersitsisimangimmat nassuerutigisariaqarparput. Ilumoortuuvorli tamatta sivikitsuinnarmik tamaaniittussaagatta, taamaattorli inuunerput ajunnginnerpaamik atortariaqarparput – aamma inuunita piffissarititaasup naalernerani.

Imaassinnaavoq ilaatigut peqqissaasut nakorsallu inuunermik annaassisussatut paarsisussatullu ilinniartinneqarsimmata pisortatigoortumillu toqujartortut immikkoortortaqaqfeqannginnerat killiffimmut pingaartinneqanngittutullusooq nassuiaataasinnaaqataasoq. Ilumummi; peqqinnissaqarfiup iluani aaqqiissuterpasuarnik periarfissaqarpoq isumagali malillugu politikikkut iliuuseqarnissaq amigaatigatsigu miserratisariaqanngilarput. Taamaammat maanna sammisaq taama pingaaruteqartigisoq oqaaseqarfiginissannut periarfissinneqarnera nuannaarutigaa.

2018-imi Inatsisartunut qineqqusaarpunga nunatsinni piartortut paarineqartarneranut pitsanngorsaaqataannissannut kissaateqarlunga. Pivusorsiorpalaartuusariaqarporli inuiaqatigiillu aningaasaqarniarnerat tunngaviusariaqarlunittaaq. Ilumoorsinnaanngilaq piartortut napparsimavissuarmi napparsimasut allat ineqatigisassagaat. Aamma ilumoorsinnaanngilaq piartortut asuli nakorsaatini kisiat nipaallisarneqartassasut, uffalu uppersarneqarsinnaasoq illutatigut allanngineq, pikkorissunillu sulisoqarneq suliaminut paasisimasalinnik inuunerup naajartornerani qajassuartumik naleqqulluurtumillu ilaqaasut peqataatillugit qularnaarisinnaasunik.

Ilaqaasut angerlarsimaffimmiissinnaanngippata aamma uninngasup qaningisaani unnuisinaanissaat inissaqartinneqartariaqarpoq. Siullermik piartortumut ajortumik pinerussaaq immikkoortortaqaqfimmilu immikkut sulialimmi peqqissaasunut artukkiisuussalluni suliassat piiminaattut suliariniarlugillu saniatigut napparsimaruluttut paaqqutariniarlugillu ilaqaasut isumaginiarsarinissai.

DIH-mi napparsimasunut tunngasunik oqaluttuanik iluatsittunik inerneqarluarfiusunillu naammattuugassaqaartaqaagut, naak aamma ilaqaasut inuunermi initoqisumik annaasaqartaralullutik. Ilinniarsimasut sammisatsinnut ineriartortitsisimavugut sulilu



isumalluuteqarpiangikkaluarluta, sulisussaaleqingaaruarluta atugassatigullu annikillioraluarluta ineriartortitserusuppugut. Ajorluartumilli iluatsittunik oqaluttuat inuiaqatitta tusarfigerpiarneq ajorpaat. Oqaaserisama pikkunartortaa tassaavoq sulisunut atugassarititaasut periarfissallu pitsaanerpaagunik, suliamut pikkorissuserput atorlugu napparsimasunut ilaqutaasunullu iluaqutaasinnaasunik sulii inerisaasinnaagatta. Inuunermik nalittorsaaneermik anniarnaveersarneqarlunilu paarineqarnermi anersaakkut isumassuineq inituvoq, paaqqinnittuniillu piffissamik, eqqissisimasinnaanermik, nukissanillu atursorujuulluni. Piginnaanernik pikkorissaaneq aamma pisariaqarpoq, taamaalilluni nunarsuarmioqataassutut paaqqutarinninnermi ingerlatseriaasimut malittarisassat naligiissumik ingerlanneqarnissaat qulakkeerumallugit. Tamanna isumaqarpunga pitsaassutsimik aamma minnerpaaffissaliisuussasoq.

Pisarnermut iliuutsinut aningaasartuutaasartunut ilisimasat paasisimasallu tunngavigalugit, nuummi DIH-mi piartortut immikkoortortaqaqarsinnaannerannik inuunermik nalitusaanermi anniarunnaarsaanermillu sulialinnik inuttalimmik pilersitsinissaq Demokraatit siunnersuutigerusupparput. Piffimmiik telemedicin atorlugu peqqinnissaqarfinnut allanut attaveqaataasinnaasumik pilersitsisoqareenera tamakkiissumik ineriartortinneqaaqqinnissaa ukkatarisariaqarpoq. Taanna inunnik pinngitsuugassaangitsunik inuunermi nalitusaanermi ilinniaqalinnik peqarnikkut qulakkeerneqartariaqarpoq, taamaalillutalu ilisimasagut innuttaasunut amerlanernut toqqissisimanartumik iluaqutaalersinnaanngussallutik, minnerunngitsumillu pisariaqartitsivissortunut saaffissaqarnissamut periarfissaqalernitsigut.

DIH-mi uninngasarfik ilanissaanik pilersaaruteqartoqareerpoq. Tamanna sulisussarsiornermi sulisoqaannarniarnermilu aamma inuunermi nalitusaaniernermi immikkoortortaqaarsinnaalerneranik pilerinarsaataasutut atorluarniartigu. Immikkoortortaqaqarfimmik taammaattumik pilersitserusunnerup aamma allatigut iluaqutaaffissaqarpoq, tassami kommuunini sulisunik piginnaasunik pikkorittunillu amingaateqarneq aamma peqqutigalugu napparsimasut nammineq angerlarsimaffimmut, utoqqaat illuannut oqilisaassinertalimmik angerlarsimaffimmulluunniit inissinneqarsinnaanngittut unnuiffigisinnaasaannik pilersitsisariaqarpugut.

Sulisunik pikkorissaaneq ingerlanneqartuarnissaa pingaaruteqarluinnarpoq, peqqinnissaqarfiullu aningaasanik tulleriarnermini suleqatigiinnik pilersitsisariaqarlunilu paaqqinnittut ilinniaqqinnissaannut pikkorissarnissaanullu periarfissiisariaqarpoq. Peqqinnissarfiup ilumini malittarisassaani pikkorissarnissamut iliuusissanik suliniummik peqartoqareerpoq, taamaammallu aamma politikikkut sulisunut periarfissap salliutinnissaanut kaammattuinnisarput arajutsissanngilarput. Takorloorparput inuunermi nalitusaanermi anniarunnaarsaallutik suleqatigiittussat nakorsartaqassasut, saniatigullu immikkut ilisimasalinnik immikkoortortaqaqarfinniik inunnik pinngitsuugassaangitsumik, aamma nunap ilaaneersunik sinniisoqassasoq.

Aningaasaqarnerup tungaatigut isumaqarpugut peqqinnissaqarfiup allaffissornikkut aningaasartuutai misissorneqassasut, ullumikkummi pissutsit arlallit takutimmagit imminut akilersinnaanngitsunik suliniuteqartoqarmat. Qaavatigullu soorlu meeqqat kingutaanik nikingajunnaarsaanerit pillugit sammisaq, Aasianni ernisarfiimmik matusineq, piffinni assigiinngitsuni nakorsassaaleqineq sulisussaaleqinermik



tungaveqartinneqartoq, kisiannili aamma aningaasartuutitut qanoq iliortarnerni paasisanilu tunuliaqutaasoq. Ilimagaarput aningaasartuutit misissornerini ingerlatsinermi allaffissornermilu, billetsisarnermilu pituttorsimasunik isumaqatigiissuteqarnikkut, ininik unnuisarfinnillu attartornermi, kiisalu sannaata allangortinneratigut akisoqisumut aningaasanik sipaaruteqartoqarsinnaassasoq. Tatiginarsoraarput silatusaartumik aningaasartuutit qanoq iliortarnerni paasisanilu tunuliaquteqarluni ingerlatsisoqassasoq, minnerunngitsumillu sulisut pikkortissut ullut tamaasa innuttaasunik sullissisunik sulisoqaannarnissaq anguniarneqartariaqarluni. Sulisut suliffimmini toqqisisimanagerat, isumannaatsuunissaat suliaminillu nuannarinninnerat politikikkut aaliagiinerni tamani isumannaartariaqarparput.

Demokraatinut pingaaruteqarluinnarpoq peqqinnissaqarfiup sannaata allangortiternera sulisunik akuutitsinertaqarlunilu tatiginninnerup anersaavani ingerlasariaqartoq. Tamanna politikikkut siunnersuutitsinnik piviusunngortitsinikkut atugassarititaasunillu ingerlatsinerup ulluinnarni nalunngisatsitut aqutsisunik ingerlanneqartumik pinngortitsinissaq anguniarlugu. Sulisut ullut tamaasa, sapaatip akunnerini tamavinni, ukiunilu arlalinni ineriartornermut ernumassuteqarlutik oqaaseqartarsimasut politikeriesugut tusaaniartariaqarpagut.

Taamatut isummersoreerluta siunnersuut Ilaqutariinnermut Peqqissutsimullu Ataatsimiititaliamut innersuupparput. Ataatsimiititaliaq inuunermi nalitusaanissamut anniarunnaarsaanermik sammisalinnik suleqatigiittussanik DIH-mi inissimasussanik, tassanngaanniillu telemedicin atorlugu peqqinnissaqarfiup sinneranut attaveqarsinnaasumik, inuit amerlanerit iluaqutigilersinnaasaannik pilersitsinissamut allannguutissatut siunnersuusiornissaa kissaatigaarput.